

Kon un boneriano a bira grandi na Aruba

Aruba ku apresio grandi pa Hubert (Lio) Booi

ORANJESTAD – Na Aruba tin un apresio grandi pa Hubert (Lio) Booi. Gobièrnu di Aruba a saka un komunikado e siman aki, den kua e apresio ku nan tin pa e boneriano aki ta resaltà. Nan ta konsideré komo un baluarte di Aruba.

Aña pasa a presentá e buki konmemorativo 'BaluArte' i pa lanta interes den komunidad pa kumpra e buki aki i tin e komo un bon rekuerto òf regalo, Minister di Kultura semanalmente lo publiká artíkulonnan pa prensa di e diferente pioneronan kultural di Aruba ku ta aparés den e publikashon.

Hubert O. (Lio) Booi d.f.m. a nase na Boneiru dia 25 di yuli 1919, pero a hasi Aruba su pais desde e edat hóben di 18 aña, te pa bira un gran promotor di bida kultural i di Papiamentu.

Segun Hubert Booi, no ta nos kurpa so mester di alimento. "Komo ser humano, nos 'spiritu' tambe mester di alimento i ener-

gia. Mester fortifiká nos mes ku konosementu, specialmente di ekspreshon i manifestashon kultural. Nos mester sigui kultivá nos mes pa huntu nos forma un pueblo kulto, demostrando kariño, apresio, amor i respèt pa otro."

Kultura

Despues di a traha na un banko komo tenedó di buki (boekhouder), Lio a bira hefe suplente di Ofisina di Turismo i di Arubaanse Voorlichtingsdienst (AVD). Na aña 1963 el a bira hefe di Ofisina di Kultura i Edukashon i for di 1978 te su penshun na 1980 el a traha komo hefe di Instituto di Kultura.

E tabata entre otro kofundador di Arubaanse Kunstkring i miembro di Sociedad Bolivariana. Tambe Lio tabata hunga komedia i skirbi obra teatral, poesia i storia. Su kreativitat den arte semper a keda resaltà, mirando su talento komo pintor outo-didáktiko. Un talento ku e

no a wanta pa su mes, pero a kompartí ku diferente alumno den su lèsnan di pintura.

Idioma

Komo kosmopólito i bon konosedó outo-didáktiko di idioma, entre otro di e idioma ruso, semper el a keda ku hopi atenshon pa e kultura arubano i amor pa Papiamentu.

Algun di su obranan literario ta 'E Perla di Caribe', un obra teatral musikal di 1955, 'Golgotha', un drama religioso skirbí na 1967, e antologia di poesia i prosa 'Muchila' ku a keda publiká na 1969 i tambe su otro obra musikal, skirbí den e mesun aña e i ku ta 'Amor di Kibaima'.

Den diferente antologia tin obra di Hubert Booi: 'Di Nos' di Pierre Lauffer (1971), 'Cosecha Arubano' (1983), 'De Navelstreng van Mijn Taal' di Anton Claassen (1992), 'Pa Saka Kara' (1998) i den 'Isla di Mi' di Frank Williams (2000).



Rekonosimentu

Lio a risibí diferente rekonosimentu pa su kontribushon kultural valioso, manera e premio 'Cadushi di Cristal' (1999). Na aña 2003 Instituto di Cultura Aruba a nombra e patio di Instituto di Cultura 'Plaza Hubert O. 'Lio' Booi' komo apresio i rekonosimentu pa su trabou amplio riba tere- no kultural.

Komo eks-hefe di Instituto di Cultura, Hubert Booi tabata di opinion ku mester tin suficiente personal i fondo disponibel pa por ehekutá diferente plan.

Lio a toka piano, komponé i pinta te na final. El a fayesé dia 20 di desèmber 2014. El a laga un legado grandi atras komo poeta, pintor, eskritor i músiko.

